

von Wulf Wager

## Allergia von meira Nochbere



Mei Nochbere – Sia wissat jo, des propere 150-Kilo-Prachtsweib, isch net berufstätig. Sie hot zwar en halbwüchsiga Sohn der die meischt Zeit ema vrdonkelta Zemmer vor em Kombjudr hängt, also wenig Gschäft macht. Aber sonscht isch se drhoim, während ihr Ma ra a'stregenda Tätigkeit bei ma namhafta Automobilbauer en dr Region nochgoht.

Jetzt kommt ab ond zua mei Nochrbr zua mr ond klagt mr sei Leid über sei Frau. I glaub, fascht alle Männer heulat sich irgendwann amol bei ma Freind

aus. Sei Frau häb so viele Allergia, hot er klagt. Wenn er zom Beispiel obends ens Bett will, no seiat Betta no net gmacht. Aber er kennt's morgens no net macha, weil sei Holda no drenn straggt, wenn er ganga muass. Deshalb vermutet er, dass sie a Bettamachallergie hot. Au häb sie a Spülmaschinaausräumallergie. Meischt dät er morgens d' Spülmaschee eiräuma ond laufa lassa, ond obends dät se äwwl no o'ausgräumt dostanda.

's Schlemmschte aber sei, dass se au no a Klopapierrolla-auffüllallergie hot. Des isch deshalb Scheiße, weil er des emmer erscht merkt, wenn 's z'spät isch. Erscht, wenn er sei Sitzung beendet ond a Klopapier braucha dät, merkt er, dass gar kois do ischt. Des isch nadierlich a o'glickliche Situation. Dene andere Allergia kann'r jo entgegawirka indem er's halt macht, aber im Klopapierfall isch des bleed.

I han no zunem gsait, dass sei Frau a faule Sau sei on koi-ne Allergia häb. Er kennt des oifach dodurch teschta, dass er sowohl d' Betta, als au die Spülmasche en Ruah lässt ond au des leere Klopapier ignoriert. Er soll sich halt a oigene Klopapierrolle irgendwo em Kloidschrank vrstecka ond emmer mitnehma, wenn er's brauchet. Späteschtens noch drei Tag wisst er no, ob des wirklich a Allergie ischt, oder ob i recht han.

Em zwoita Fall ka i ehm bloß rota – a andere Muadr hot au a schee's Kend...

Bis näggschd Woch'

Ihr

Wulf Wager

A handwritten signature in black ink, appearing to read 'Wulf Wager'. The signature is stylized and written in a cursive script. It is positioned below the printed name 'Wulf Wager'.